

Boizcaiq

□ Yinj Fuzgen / 尹福建

Daegvaz ndaep aen soujgih, ndawsim nyapswdswd.

Banhaet, Daegvaz youq henz dah cetbyaij lienhdang, maij yawj va hai roeg heuh, mizyinx sisi. Sawqmwh, aen soujgih yiengj lo. De baez ciepingq, ndaejnyi gij sing Auseiq, de doq miz di hozhwnj, bakcumh cam: “Miz maz saeh ha?” Auseiq naeuz: “Gou yaek daeuj ranz mwngz.” Daegvaz ngamq siengj naeuz ngoenzneix mbouj ndaej hoengq, heuh de gaej daeuj lo. Mboujliuh Auseiq ciepingq naeuz: “Seizneix gaengq naengh youq gwnz banci, diemj lai cung dem couh daengz ranz mwngz lo.” Daegvaz mbouj caiq mizsim cetbyaij, de cienq ndang din naekgyumgyum byaij maranz.

Boux Auseiq neix, caeuq Daegvaz caemhcoj, suenq dwg banboh Daegvaz. Auseiq dwg boux vunz lauxsaed ndeu, vunzmbanj okrog bae dajgoeng fodfod, de cix maeuq youq ranz lauxlaux saedsaed guh reihnaz, lauxlaux saedsaed aeuyah senglw. Baez seng couh seng song dah song daeg 4 boux lwg. De vunz mazmwnh, guh reihnaz hix mbouj rox dajsuenq, caenh lumj duzvaiz nei goedgaex okrengz. Song gvanbaz guh dai guh lix, cij cengqgengz ndaej ciengx 6 aen dungx.

Doeklaeng, baihgwnz hai aen cangjcaqdangz ndeu, heuh gyoengq nungzminz ndaem oij, Auseiq hix riengz ndaem oij. Bi daih’it, ndawranz couh ndaej miz haeux gwn imq, bi daihngeih couh miz di cienzrom lo. Ngamq yiet ndaej gaemz heiq ndeu, byawz liuh, ngoenznit doek fwnraq, ranzbyaq deng rumz gienj, mehyah Auseiq sawqmwh baenz binghnaek, gij cienzoij lw haenx dawz bae yw bingh cungj mbouj gaeuq, lij noix song fanh maenz. Auseiq cij ndaej dauqcawq bae ciq cienz. Doenghbi haenx, lajmbanj ranz lawz cungj mbouj fouq, Auseiq naj riuhehe, ndaekgyaeuj saxbaiq, ranzgwnz ciq geijcib, ranzlaj ciq geij bak, cij caeuqyawx ndaej fanh maenz, lij ca fanh maenz dem, bae gyawz ra ya? Auseiq fwt ngeix daengz Daegvaz. Daegvaz doeg daihhag bizyez le, faenboiq ma yienhsingz hwnjban. Auseiq hix rox, Daegvaz camgya gunghcoz ngamq 3 bi, gunghsw hix mbouj lai, caiq gangj de ngamq aeuyah, ndaw fwngz mbouj miz lai yawz, hoeng baenzlawz gangj, ngafaex cungj loet gvaq go’em, Auseiq caenh ndaej ra de lo.

Mwhde, Auseiq daeuj ranz Daegvaz, Daegvaz saeknaj saep lumj mbawbyaekroz. “Auseiq ha, gij gunghsw gou ngamq gaeuq gwn, mbouj lw saek faen dem lu, gou hix siengj ciq hawj mwngz, hoeng……” Daegvaz mbehai song fwngz, ngauzgyaeuj sigsig. Mehyah Daegvaz ndwn

youq henz ndang, riunyumj naeuz: “Yw bingh youqgaenj, ciq hawj Auseiq gonq.” Daegvaz hozgaek naeuz: “Bae gyawz aeu cienz?” Mehyah de naeuz: “Gij cienzrom cawx densigih caeuq binghsiengh, ciq hawj Auseiq gonq.” Vih gienh saeh neix, Daegvaz daengz seizneix lij aeuqheiq.

Daegvaz hai dou haeuj ranz, mehyah cingq sauq ranz nyaengqfoedfoed, raen de saeknaj mbwngyaeng’yaeng, couh cam: “Guh maz lo, ngoenzneix mbwn’gvengq ronghcingx, gwnz naj mwngz baenzlawz fwjbumz ngaungau ya? Daegvaz hozndat naeuz: “Gaej dwen lo, Auseiq yaek daeuj ranz lu.” Mehyah geizheih cim Daegvaz: “Auseiq daeuj ranz mwngz nyap maz?” Daegvaz naeuz: “Mwngz lumz la, de lij yiemqcaiq raeuz 5000 maenz.” Mehyah riu naeuz: “Yawj mwngz, 5000 maenz hawj mwngz baenzlai sim in, ranz raeuz hix mbouj noix 5000 neix.” Daegvaz naeuz: “Byawx rox de baezneix daeuj dwg mbouj dwg youh ciq cienz?” Mehyah nai naeuz: “Gij lwg de seizneix hung lo, mbouj itdingh dwg ciq cienz ne.” Daegvaz naengh gwnz sahfaz, song da ngaenzngwdngwd.

“Auseiq yaek daengz luba, gou bae cawx di byaek ma dakdaih de.” Mehyah riu swxbyaek yaek okdou. Daegvaz hozgaek naeuz: “Cawj vanj faenj couh ndaej lo, guh baenzlai guh maz. Mehyah riuriu naeuz: “Vunz baenzlai nanz cij yamq haeuj ranz raeuz saek baez, mbouj hawj gwn donq ndei he, cienz hawj vunzmbanj rox, mbouj riu mwngz ged ha?”

Mehyah okdou le, Daegvaz lij dungx fanfoedfoed. Auseiq caeuq de ciq cienz seiz naeuz bilaeng couh boiz. Byawz rox, ciq gaeq hawj nyaen, ciq bae mbouj rox dauq, gvaq geijlai baez bilaeng lo, diuz bwn gaeq cungj mbouj raen. Gvaq 5 bi le, cij lumj yiengz ok haexnaed nei, gek song sam bi cij boiz saek cien. Mbouj boiz cixbah lo, gvaqlaeng youh yaek daeuj ranz ciq cienz.

Bihaenx, Auseiq riu song daeh lwgsawzdip daengz ranz, naj nyaeuqnyatnyat, riumbw naeuz: “Caen doiq mbouj hwnj lu, 4 boux lwg cungj yaek doegsaw, ciq dwk daemdaenx lo, cungj ciq mbouj ndaej saek faen, cij ndaej ra daengz mwngz lo. Caiq ra mbouj ndaej cienz, gou couh mbouj hawj gyoengq lwg hwnjhag lo. Daegvaz najlaep ngaungau, ngamq yaek oksing, mehyah de gaengq riuhehe naeuz: “Dwg ha, lwgnyez mbouj doegsaw couh ngu hix baenz seiqvunz lo. Auseiq mwngz gaenj yungh cienz, couh ciq hawj de ba.” Naeuz sat, doq haeuj rug bae aeu 3000 maenz oet hawj Auseiq. Daegvaz aek in lumj cax heh. Byawz liuh, ndaej gwn deiheih daeuj, ngoenzneix, Auseiq youh daeuj ranz, mbouj dwg



ciq cienz dwg guh maz.

Dingdung! Aen lingzdou sawqmwh yiengj, Daegvaz doeksaet yat, hoeng de daegdaengq ngaiznyed cij hai dou. “Ninz ndaek la, baenz nanz cij haidou?” Raen mehyah cawx byaek dauqma, Daegvaz soeng gaemz heiq ndeu.

Mehyah riugekgek naeuz: “Cawx duz gaeqdoj ndeu, bizbwdbwd, Auseiq ngah gwn byaseng, lij cawx duz byavanx ndeu, hawj mwngz caeuq Auseiq soengq laeuj.” Daegvaz ndaw hoz ngeix: Gou lij yiemqmbw Auseiq daeuj ranz, de dauq angqvauvau lumj ciepdaih hekqvij nei.

Dingdung! Lingzdou youh yiengj. Daegvaz mingz rox dwg Auseiq, lij gyajswz cam vah: “Byawz ha?” Baihrog vunz han: “Gou, Auseiq la.” Daegvaz naeuz: “Caj yaep he.” Bak naeuz ndang mbouj doengh. Mehyah de gaengq riengjret byaij bae hai dou lo.

Rog dou, Auseiq song fwngz riu rim doxgaiq, de ndaekgyaeuj gungjhwet, yaemhywx mbouj gamj yamq din haeuj dou, naeuz: “Gou duet haiz menh haeujbae.” Mehyah Daegvaz najriu lumj rumzcin, sing sepsadsad naeuz: “Mbouj yungh duet haiz, Auseiq. Haeujdaeuj! Haeujdaeuj!”

Caj Auseiq naengh roengzdaeuj, Daegvaz naeuz: “Auseiq, mwngz daeuj couh daeuj lo, lij daiq doxgaiq guh maz.” Auseiq riu naeuz: “Hix mbouj miz doxgaiq lai, haeuxyangz dwg ndaw reih gag ndaem, gaeqdon dwg ndaw suen gag ciengx.” Doeng cej sae cej yaep he, Daegvaz hix ra mbouj ok vah lawz caeuq Auseiq gangj lo, Auseiq hix dwg boux vunz bakmwt he, song boux couh yaemz roengzdaeuj. Gvaq yaep he, Auseiq cij mbajmbwdbwd naeuz: “Daegvaz ha, caen doiq mbouj hwnj lo, ciq……ciq cienz mwngz baenzlai nanz, caengz ndaej……ndaek boiz.” Daegvaz guhhek naeuz: “Auseiq, gaej yienghneix naeuz, ranz mwngz lwg lai reihnaz noix, mbouj yungzheih.” Daegvaz congghbak yienghneix naeuz, ndaw dungx cix youfubfub, de ceiq lau Auseiq haibak cam de ciq cienz.

Auseiq youh naeuz: “Gou senqdi siengj boiz sou lo, hoeng ranz gou yiemqcaiq lai lai, ndaej saekdi cienz cungj boiz hawj gij ranz vunzlaux gonq. Gou naemj, sou lij miz

gunghsw hix lingx, couh siengj laeng di boiz sou.

Mehyah Daegvaz daj ndaw ranzdajcawj bungj byaek okdaeuj, ciepingq vah naeuz: “Auseiq, mbouj youqgaenj law, mwngz seizneix lij hoj, laeng di menh boiz.” Daegvaz lau Auseiq haibak ciq cienz, vaiqdi naeuz: “Auseiq ha, mwngz naengh baenz ngoenz ci lo, dungxiek luba. Vaiq haeuj daiz, song gvanbaz dou hix nyaengq, yaek daengz cieng lo, hong lai, gwn sat, lij bae gyaban ne.” Auseiq ndwn hwnjdaeuj, miz di najmong naeuz: “Yienghneix, gou ndawranz hong caemh nyaengq, gou couh mbouj ngu hix sou lo.” Naeuz sat, daj ndaw daehbuh mbon yaep he, dawz bau doxgaiq aeu suli duk ndeu okdaeuj, doq ndenq hawj Daegvaz doq naeuz: “Caen docih gvanbaz sou lu, ciq cienz hawj ranz gou dohgvaq seiznanh.” Daegvaz ngeizvaeg cam: “Auseiq, neix dwg maz ha?” Auseiq naeuz: “Mwngz geqgeq yawj, gaeuq soq lwi, 5000 maenz.” Daegvaz doq najhaiyab, angqvauvau ciepingq cienz haeuj fwngz, bakmbaeu mbengmbeng naeuz: “Auseiq, haeuj daiz ma, ngoenzneix miz byaseng, gwn song cenj laeuj menh dauqranz.”

Seiz gwn laeuj, Daegvaz mbouj miz vah ra vah cam: “Auseiq, mwngz seizneix fatcaiz la?” Auseiq riuyaengyaeng naeuz: “Fatcaiz gangj mbouj daengz, seizneix lwg hung le, ndaej bang guhhong lo, cawz ndaem oij le, lij ndaem geij moux makgam, ndaej di cienz souhaeuj, ndaw fwngz soeng di lo.” Daegvaz riuhehe naeuz: “Yienghneix gou hix cuengqsim lo.”

Gvaqlaeng, Daegvaz cij rox, Auseiq vih boiz song fanh maenz cienz caiq neix, 20 bi daeuj, ngoenzngoenz hwnj bya mbaet ywdoj bae gai vuenh cienz, gai ndaej di boiz di, boiz daengz seizneix cij ndaej boiz caez. Raen de 50 lai bi lo, miz di cojgvaq de, naeuz: “Auseiq, mwngz gaej guh baenzlai, dwgrengz lai lo, cienz mbouj boiz couh suenq lo.” Auseiq naeuz: “Mbouj baenz, mbouj boiz gou ninz mbouj ndaek. Vahlaux naeuz, faex miz rag, vunz miz naj, bouxvunz roxsoq mbouj gangjgyaj. Naeuz ciq cienz doeklaeng youh mbouj boiz, neix mbouj dwg luq vunz ha?”